

第三一三冊

明倫彙編

官常典

忠烈部

七三一七三
(卷)

古今圖書集成

中華書局影印

古今圖書集成

中華書局影印



欽定古今圖書集成明倫彙編官常典

第七百二十二卷目錄

忠烈部名臣列傳十七

宋一

張業

秦傳序子夷

裴濟

任福

耿傳祖昭化

董元亨

張忠

潘益

馬貴

孔宗旦

郭恩

蘇絨子子明直溫

陳永齡

張吉

王奇

譚必

高永年

王棟

彭汝方

丁仲修

張理

輔褒

董公健

龔慎儀

康保裔

梁仲保

葛懷敏

馬遂

曹觀

宋士堯

趙師旦

王從政

徐璽

武英

唐子正

高敏

景思忠

李英

石天麟

潘中

趙育才

宋旅

陳華

李振

項德

翁開

王行之

許瓊

詹良臣

蔣煜

毛鼎

恬大姓

唐敏求

林師益弟師舜師皋

折可與

朱昭

孫益

祁翊

朱友恭

李翼

王唐臣

閻城

孫逢

梅溶

曹夫

江仲明

王衡

祝汝秩

方瓊

孫翊

張忠輔

傅察

史抗子禧古

孫谷

郭濟

吳革

李登

劉子英

阮駿

官常典第七百二十二卷

忠烈部名臣列傳十七

宋一

張業

按山西通志業雲應行軍都部署拔四州遼人復寰州業力戰重傷為遼所獲三日不食而死

龔慎儀

按福建通志慎儀字世則邵武人開寶初奉太祖命往招劉銀被執歸除駕部郎中欽州刺史宜春賊盧

絳陷歛且趨閩欲引慎儀為謀主慎儀厲聲曰吾已受宋真命雖一日失援肯從賊反耶遂舉家遇害

秦傳序子夷

按宋史忠義傳傳序江寧人淳化五年充夔峽巡檢使李順之亂賊衆奄至傳夔州城下傳序督士卒晝夜拒戰嬰城既久危蹙日甚長吏皆奔竄投賊傳序謂士卒曰吾為監軍盡死節以守城吾之職也安可苟免乎城中乏食傳序出囊家服玩盡市酒肉以犒士卒慰勉之衆皆感泣力戰傳序度力不能拒乃為蠟書遣人間道上言臣盡死力誓不降賊城壞傳序赴火死傳序家寄荆湖間子夷遡峽求父屍溺死人以為父死於忠子死於孝奏至太宗嗟惻久之錄傳序父子忠為殿直以錢十萬賜其家煦卒復以煦弟昉為三班奉職

康保裔

按宋史忠義傳保裔河南洛陽人祖志忠後唐長興中討王都戰歿父再遇為龍捷指揮使從太祖征李筠又死於兵保裔在周屢立戰功為東班押班及再遇陣歿詔以保裔代父戰從石守信破澤州明年攻河東之廣陽獲千餘人開寶中又從諸將破契丹於石橫關累遷日騎都虞候轉龍衛指揮使領登州刺史端拱初授瀋州團練使徙定州天雄軍駐泊部署尋知代州移深州又徙高陽關副都部署就加侍衛馬軍都虞候領涼州觀察使真宗即位召還以其母老勸養賜以上尊酒茶米俄領彰國軍節度出為并代都部署徙知天雄軍并代列狀請留詔褒之復為高陽關都部署契丹兵大入諸將與戰於河間保裔

選精銳赴之會暮約詰朝合戰遲明契丹圍之數重左右勸易甲馳突以出保裔曰臨難無苟免遂決戰

二日殺傷甚衆賊踐塵深二尺兵盡矢絕援不至遂歿焉時軍駕駐大名聞之震悼廢朝二日贈侍中以

其子繼英爲六宅使順州刺史繼彬爲洛苑使繼明爲內園副使幼子繼宗爲西頭供奉官孫惟一爲將

作監主簿繼英等奉告命謝曰臣父不能決勝而死陛下不以罪其卒幸矣臣等願蒙非常之恩因悲涕

伏地不能起上惻然曰爾父死王事贈賞之典所宜加厚顧謂左右曰保裔父祖死疆場身復戰歿世有

忠節深可嘉也保裔有母年八十四遣使勞問賜白金五十兩封爲陳國太夫人其妻已亡亦追封河東

郡夫人保裔謹厚好禮嘉賓客善騎射弋飛走無不中嘗握矢三十引滿以射箭鏑相連而墜人服其妙

屢經戰陣身被七十創貸公錢數十萬勞軍歿後親吏醫器玩以償上知之乃復厚賜焉繼英仕至左衛

大將軍貴州團練使嚴於取軍厚於撫宗族其卒也家無餘財方保裔及契丹血戰而援兵不至惟張凝

以高陽關路鈴轄領先鋒李重貴以高陽關行營副都部署率衆策應遇契丹兵交戰保裔爲敵所覆重

貴與凝赴援腹背受敵自申至寅力戰敵乃退當時諸將多失部分獨重貴疑全軍還屯疑議上將士功

狀重貴喟然曰大將陷歿而吾曹計功何面目也上聞而嘉之重貴仕至知鄭州領播州防禦使改左羽林軍大將軍致仕凝加殿前都虞候卒贈彰德軍節

度使

裴濟

按宋史本傳濟字仲薄絳州聞喜人唐相耀卿八世孫後徙家河中濟少事晉邸同輩有忤悼者濟屢糾

其過失被譖出補太康鎮將未幾濟濟者坐法太宗知濟可任會邸位補殿直爲天威軍兵馬監押及平

太原征幽薊濟迎謁陪扈令監軍易州契丹攻城不能下以勞遷西頭供奉官太平興國中江表盜起命

爲巡檢遷崇儀副使召還遷崇儀使監戍兵於威鹵軍塗次鎮州夜有賊騎扣城門大呼曰官軍至矣州

將然之促守吏開關濟遽止之曰此必妄也及旦果有敵兵遷去太宗嘉之遷西上閣門使定州都監就

加行營鈴轄尋知定州契丹三萬騎來攻濟逆擊於徐河斬數千級獲牛馬鎧仗甚衆淳化初與周瑒同

判四方館未幾爲鎮州行營鈴轄又與李繼隆擊賊於唐河濟短兵陷陣賊大敗走僞詔褒美初繼隆以

濟性剛不悅之及是役撫濟恨相知之晚改四方館使復知定州徙天雄軍鈴轄遷客省使復知定州至

道二年改內客省使知鎮州立春日出土牛以祭酌奠始畢有卒挾牛去濟察其舉止知欲爲變亟命擒

之果有竊發者數十人已劫鄭間矣悉覓捕腰斬之軍民肅然濟在鎮定凡十五年威績甚著召還知天

雄軍咸平初李繼遷叛以濟領順州團練使知靈州兼都部署至州二年謀緝八鎮與屯田之利民甚賴

之其年清遠軍陷夏人大集斷饒道孤軍絕援濟刺指血染奏求救甚急兵不至城陷死之上聞嗟悼特

贈鎮江軍節度三子並優進秩濟在諸使中甚有聲望及沒夏人皆惜之景德中濟妻永泰郡君景氏卒

特詔追封平陽郡夫人諸子給奉終喪子德谷虞部

郎中德基至如京使德豐殿中丞

梁仲保

按廣西通志仲保賓州人勇鷙過人以三班奉職充本州團練寶元中知州吳元球以仲保豫平安化蠻

之勞復請增給獎之俸智高引衆向賓仲保迎戰相持數日賊衆益集仲保勢孤竟死戰所智高因陷賓

城州人傷之立廟以祀

任福

按河間府志福字祐之開封人咸平中爲莫州刺史仁宗時累官侍衛馬軍都虞候康定二年與元昊戰

好水川身被十餘矢有小校劉進者勸福自免福曰吾爲大將兵敗以死報國爾揮鐵簡挺身決關槍中

左頰絕其喉而死奏至帝震悼之贈武勝軍節度使兼侍中

葛懷敏

按河間府志懷敏霸之子以廕授西頭供奉官累官知隰莫保三州太平興國五年徙知滄州進澤原路

兼招討經略安撫慶曆二年元昊寇鎮戎軍墮敗遂與諸將皆遇害奏至帝嗟悼久之贈鎮戎軍節度使兼太尉諡忠隱

耿傳

祖弘化

按宋史任福傳傳字公弼河南人祖弘化爲蜀州司戶參軍盜據城欲脅以官昭化大罵至斷手足不屈

而死傳少喜俠尚氣初以父蔭爲三班奉職換伊陽縣尉歷明州司理參軍遷將作監丞知永寧縣河南

守宋綬薦其材遷通判儀州徙慶州時議進兵西討以傳督一道德糧饋會元昊入寇參任福行營軍事遇

獻姚家川諸將失利敵騎益至武英勸傳避去傳不答英嘆曰英當死君文吏無軍責奈何與英俱死朱觀亦謂傳少避賊鋒而傳愈前指顧自若被數創乃死始傳與觀營籠落川夜作書遺福以其戒小勝前與敵大軍遇深以持重戒之自寫題觀名以致福軍中傳死後韓琦得其書於隨軍孔目官彭忠奏上之詔贈傳右諫議大夫官其子瑗爲太常寺太祝璩爲太常寺奉禮郎璋爲將作監主簿珪試祕書省校書郎琬同學究出身

馬遂

按宋史忠義傳遂開封人初隸龍衛軍補散直改三班奉職爲北京指使聞王則叛中夜叱咤晨起詣留守賈昌朝請擊賊昌朝因使持榜入貝州招降則盛服見之遂諭以禍福輒不答遂將殺則而無兵仗自隨時張得一在側欲其助己目得一得一不動遂奮起投杯抵則扼其喉歐之流血而左右卒無助之者賊黨攢刃聚謀至斷一臂猶嘗則曰妖賊恨不斬汝萬段賊縛遂廳事前支解之則倉猝被歐傷病數日乃起事聞仁宗歎息久之贈官苑使封其妻爲旌忠縣君賜冠帔官其子五人後得殺遂者驍捷卒石慶使其子剖心而祭之

董元亨

按宋史忠義傳元亨深州東鹿人累官至國子博士通判貝州王則據城叛是日冬至元亨方與州將張得一朝謁天慶觀夜漏未盡變起倉猝衆莫知所爲元亨促馬馳還坐廳事賊黨十餘人擐甲露刃排闥而入左右皆奔潰賊脅元亨曰大王遣我來索軍資

庫鑰元亨據案叱之曰大王誰也妖賊乃敢弄兵乎我有死耳鑰不可得也賊將郝用繼來索愈急曰庫帑今日大王所有也可不上鑰乎元亨厲聲張目罵賊用遂殺之賊爭入攜鑰而去事聞仁宗曰守法之臣也贈太常少卿錄其子孫三人賊平獲郝用斬以祭元亨

曹觀

按宋史忠義傳觀字仲賓曹修禮子也叔修古卒無子天章閣待制杜杞爲言於朝授觀建州司戶參軍爲修古後皇祐中以太子中舍知封州儂智高叛攻陷邕管趨廣州行至封州州人未嘗知兵士卒纔百人不任戰鬪又無城隍以守或勸觀遁去觀正色叱之曰吾守臣也有死而已敢言避賊者斬麾都監陳騁引兵迎擊賊封州令率鄉丁弓手繼進賊衆數百倍騁兵敗走鄉丁亦潰觀率從卒決戰不勝被執賊戒勿殺俾使拜且誘之曰從我得美官付汝兵柄以女妻汝觀不肯拜且誓曰人臣惟北面拜天子我豈從爾苟生邪速殺我幸矣賊猶惜不殺從置舟中觀不食者兩日探懷中印章授其從卒曰我且死若求間道以此上官賊知其無降意害之至死詬賊聲不絕投屍江中時年三十五事聞贈太常少卿錄其子四人妻劉避賊死於林峒追封彭城郡君加賜冠帔又贈修古尚書工部侍郎封修古妻陳頴川郡君當智高之反乘嶺南無備縣吏往往望風竄匿故賊所向輒下獨觀與孔宗旦趙師旦能以死守後田瑜安撫廣東乃爲觀立廟封州

張忠

按開封府志忠開封人以材武稱累官英州團練使儂智高圍廣州忠不介冑而前會先鋒遇賊奔忠手拉賊帥二人馬陷泥遂中標槍死焉

宋士堯

按廣西通志士堯馬平人皇祐中儂智高寇邕州士堯率兵往救與智高戰不勝少休再戰爲所敗被賊斬首士堯尸不墮馳馬還營賊望見傳以爲異不敢逼後贈屯衛大將軍

潘益

按廣西通志益蒼梧人儒衣持髮言動不羣或謂其有先知儂智高至蒼梧索益至問之曰君視吾形貌有異哉益曰相止賊耳何異也又問曰梧城何日可下曰雖經歲亦不下復問吾欲奄有嶺海長王南表何如曰殄滅不久何王之有智高大怒遂害之益不爲改容

趙師旦 馬貴

按宋史忠義傳師旦字潛叔樞密副使稹之從子美容儀身長六尺少年頗涉書史尤刻意刑名之學用稹詹試將作監主簿累遷寧海軍節度推官知江山縣斷治出己吏不能得民一錢棄物道上人無敢取以薦者改大理寺丞知彭城縣遷太子右贊善大夫移知康州儂智高破邕州順流東下師旦使人覘賊還報曰諸州守皆棄城走矣師旦叱曰汝亦欲吾走耶乃大索得謀者三人斬以徇而賊已薄城下師旦止有兵三百開門迎戰殺數十人會暮賊稍却師旦語其妻取州印佩之使負其子以匿曰明日賊必大至吾知不敵然不可以去爾留死無益也遂與監押

馬貴部士卒固守州城召貴食貴不能食師旦獨飽如平時至夜貴臥不安席師旦即臥內大軒遲明賊攻城愈急左右請少避師旦曰戰死與戮死何如衆皆曰願爲國家死至城破無一人逃者矢盡與貴俱還據堂而坐智高麾兵鼓譟爭入脅師旦師旦大罵曰餓僚朝廷負若何事乃敢反邪天子發一校兵汝無遺類矣智高怒并貴害之賊既去州人爲立廟事平贈光祿少卿賜其母王長安縣太君冠祿祿其子弟并從子三人師旦遇害時年四十二樞過江山山之人迎師旦喪哭祭於路絡繹數百里不絕

王從政

按宋史趙師旦傳師旦同時有王從政者以東頭供奉官閤門祇候與儂智高戰於太平場被執罵賊不已至以沸湯沃之終不屈而死贈信州刺史錄其孫二人

孔宗旦

按宋史忠義傳宗旦魯人爲邕州司戶參軍儂智高未反時州有白氣出庭中江水溢宗旦以爲兵象度智高必反以書告知州陳珙珙不聽後智高破橫州即載其親往桂州曰吾有官守不得去無爲俱死也既而州破被執欲任以事宗旦叱賊且大罵遂被害始宗旦官京東與李師道徐程尚同等四人爲監司耳目號爲四瞪人多惡之其後立節如此知袁州祖無擇以其事聞贈太子中允

徐璽

按廣西通志璽字伯殊以讀書有奇略知名州里舉於鄉攝宜州討歐希範有功授白州長史與儂智高

力戰於金城驛而死事聞贈大理寺丞

郭恩

按開封府志恩開封人累官秦隴路兵馬鈐轄嘉祐中夏人入寇臥牛峯恩與力戰被執不屈自殺贈同州觀察使

武英

按山西通志英字漢傑太原人爲忻代巡檢從任福破白波城遷涇原行營都監夏人入寇與福合諸將戰張家堡斬首數百級敵棄羊馬僞遁諸將皆趨利爭進英以爲前必有伏衆不聽已而伏發福等皆歿英猶力戰自辰至申矢盡遇害贈邢州觀察使

蘇緘

子明 子正 孫廣 直溫

按宋史忠義傳緘字宣甫泉州晉江人舉進士調廣州南海主簿州領蕃舶每商至則擇官閱實其貨商皆豪家大姓習以客禮見主者緘以選往商樊氏輒升階就席緘詰而杖之樊訴於州州召貴緘緘曰主簿雖卑邑官也商雖富部民也邑官杖部民有何不可州不能詰再調陽武尉劇盜李襄棄于民賊曹莫能捕緘訪得其處萃衆大索火旁舍以迫之李從衆逸出緘馳馬逐斬其首送府尹賈昌朝驚曰儒者乃爾輕生邪累遷祕書丞知英州儂智高圍廣緘曰廣吾都府也且去州近今城危在旦暮而不往救非義也即募士數千人委印於提點刑獄軻軻夜行赴難去廣二十里止營廣人黃師宓陷賊中爲之謀主緘擒斬其父羣不逞並緣爲盜復捕殺六十餘人招其誑誤者六千八百人使復業賊勢沮將解去緘分兵先扼其歸路布槎木互四十里賊至不得前乃遠

出數舍渡江由連賀而西緘與賊戰摧傷甚衆盡得其所略物時諸將皆能獨緘有功仁宗喜換爲供備庫副使廣東諸監管押兩路兵甲遣中使賜朝衣金帶襲賊至邑大將陳曙以失律誅緘亦貶房州司馬復著作佐郎監越州稅十餘年始還副使知康州屋多茅竹戍卒楊禧醉焚營延燒民廬因乘以爲竊緘數之於市又坐謫潭州都監未幾知鼎州熙寧初進如京使廣東鈐轄四年交趾謀入寇以緘爲皇城使知邕州緘伺得實以書抵知桂州沈起起不以爲意及劉彝代起緘致書於彝請罷所行事彝不聽反移文令貴緘沮議勿得輒言八年蠻遂入寇衆號八萬陷欽廉破邑四縣緘聞其至開州兵得二千八百名僚吏與郡人之材者授以方略勒部隊分地自守民驚震四出緘悉出官帑及私藏示之曰吾兵械既具蓄聚不乏今賊已薄城宜固守以遲外援若一人舉足則羣心搖矣幸聽吾言敢越佚則羣戮汝有大校翟績潛出斬以徇由是上下脅息緘子元爲桂州司戶因公事攜妻子來省欲還而寇至緘念人不可戶曉必以郡守家出城乃獨遣子元留其妻于選勇士拏舟逆戰斬蠻酋一邑既受圍緘晝夜行勞士卒發神臂弓射賊所殪甚衆緘初求救於劉彝彝遣將張守節救之逗遛不進緘又以蠟書告急於提點刑獄宋球球得書驚泣督守節守節皇恐遽移屯大來嶺回保崑崙關猝遇賊不及陣舉軍皆覆蠻獲北軍知其善攻城陷以利使爲雲梯又爲攻濠洞蒙以華布緘悉焚之蠻計已窮將引去而知外援不至或教賊襲土傅城者頃刻高數丈蟻附而登城遂陷緘

猶領傷卒馳騎戰愈厲而力不敵乃曰吾義不死賊手亟還州治殺其家三十六人藏於坎縱火自焚鑾至求尸皆不得屠郡民五萬餘人率百人爲一積凡五百八十餘積置三州城以填江邑被圍四十二日糧盡泉涸人吸濕麻水以濟渴多病下利相枕藉以死然訖無一叛者緘憤沈起劉彝致寇又不救忠欲上疏論之屬道梗不通乃榜其罪於市冀朝廷得聞焉神宗聞緘死嗟悼贈奉國軍節度使諡曰忠勇賜都城甲第五鄉里上田十頃聽其家自擇以子元爲西頭供奉官開門祇候召對謂曰邑管賴卿父守禦儻如欽廉即破則賊乘勢奔突桂象皆不得保矣昔張巡許遠以睢陽蔽遮江淮較之卿父不能過也改授殿中丞通判邕州式子子明子正孫廣淵直溫與緘同死皆褒贈焉起與彝皆坐謫官緘沒後交人謀寇桂州行數舍其衆見大兵從北來呼曰蘇城隍領兵來報怨懼而引歸邑人爲緘立祠元祐中賜額懷忠

唐子正

按廣西通志子正字幾卿興安人治平初舉孝廉後通判邕州熙寧八年冬交趾圍邕子正與蘇緘率禁兵固守外援不至城陷子正及緘死之

陳末齡

按廉州府志末齡熙寧間知欽州時交趾入寇末齡率兵固守城陷不屈而死

高敏

按宋史忠義傳敏登州人爲涇原指使數與西夏戰遭重傷范仲淹韓琦皆薦之爲開門祇候歷利州路

邵軍環處郡監主蕃部事光園大順城偏將趙懷德力戰其下以銀買級主帥李復圭以所部不整欲治之敏言懷德善用大戰必勝當略其小過且蕃官難強以漢法復圭乃止羌人聲言將出鄜延敏屢白復圭曰兵家之事聲東擊西環處嘗破白豹金湯結讐已深不可不備已而果以兵三十萬來寇總管楊遂駐兵大義以敏爲先鋒將夏人攻奪大順水砦敏出通路自寅及午且戰且前多所斬獲次榆木援兵不至中流失死年五十七官止東頭供奉官詔贈嘉州刺史錄其子三子爲侍禁殿直

張吉

按宋史忠義傳吉慶州卒也爲淮安鎮守烽夏人寇東谷掠得之吉以兵使呼城中曰淮安諸砦已破宜速降吉反其辭曰努力諸砦無虞賊糧盡且去矣毋庸降賊怒害之詔贈內殿崇班又錄其子

景思忠

按宋史忠義傳思忠字進之普州安岳人以父西上開門使泰蔭累官西京左藏庫使爲遂州駐泊都監夷人寇涪井鈴轄張承祐出兵救之思忠部卒五百爲前鋒夷乘險薄官軍官軍戰不利死者十之六左右勸思忠引避不聽奮劍疾戰而死走馬使張宗望爲言詔察訪熊本考實得其事神宗憫之官思忠及同死者之子七人餘皆賜其家錢帛

王奇

按宋史忠義傳奇汾州人武舉中第章惇經營湖北溪洞以爲將領降其酋舒光貴縛元猛平懿洽等州累遷如京副使爲湖南都監徙廣西宜州蠻寇邊奇

領兵至天河縣期旦日會戰裨將費萬夜以衆竊出河泥隘戰沒經略使移書迫奇奇不能堪後數日蠻萬人驟集奇輕出遂敗麾下猶數百人勸策馬逃去奇罵曰大丈夫當盡節以報國何走爲戰而死詔贈皇城使忠州防禦使官其家六人仍賜金帛

李英

按高明縣志英字子厚同舉究出身天聖間任象州司理參軍轉博羅用辟薦歷橫州白州欽州推官所至以廉能稱熙寧中欽州守臣寡謀啓孽交人出其不意攻城陷之英以守死一家藏於敵刃者十有三

譚必

按樂昌縣志必字子思六歲通九經能綴文殿中丞王公益爲韶州牧必甫七歲應童子科日廖謬誦萬言益子荆公奇之呼爲九兄後荆公薦必至京師試不第必益憤激下帷因廢觀然性嗜學即不辨字亦淹滯一室令人聲所書危坐而聽譚討不遺餘力其後年四十日復明錄薦登賈黯榜進士熙寧中會荆公當事欲用之必竟以家難免後授邕州推官時役賊儂智高薄邕必堅壁以禦圍久食盡援兵不至城陷賊執之欲啗以利必抗罵不已遂遇害事上聞賜金紫光祿大夫太子太傅景泰七年賜諡忠愍入張文獻祠配享邕州亦有廟祀

石天麟

按江南通志天麟字文祥禹勤子元豐間蠻事起有

旨募勇敢士天麟請行侍禁李資由破州入諭蠻長以禍福相率詣降天麟插血與盟資武人多戮降者天麟力止之弗聽未幾蠻復反天麟督兵力戰遇害

高永年

按宋史忠義傳永年河東蕃官也為麟州都巡檢王贈取青唐永年總蕃兵為先鋒贈入邈川而宗哥叛永年以千騎直抵其城開省章峽路擊走叛羌結陣還青唐羌攻甚急復擊之去苗履姚雄以援師至戰溪蘭宗堡屢少却永年領勁騎斷羌為二乃退復與李克保敦谷又戰於乾溝單馬援矛刺羌酋彪雞斃萬衆之中斬其首餘衆皆遁已而薩援自乾溝逼鄯州永年佐贍拒守及雄棄遼都皆以永年殿歸師崇寧初知岷州蔡京議復兩州王厚使永年帥兵二萬出京關王克安川堡遂至湟即知州事自皇城副使進四方館使利州刺史為熙秦兩路兵都統制將前軍駐宗哥北溪賒羅撒萃精勇據高阜欲衝官軍永年揮選鋒突陣師乘之羌大敗遂平鄯州遷賀州團練使知其州溪賒羅撒合夏國四監軍之衆逼宣威城永年出禦之行三十里逢羌帳下親兵皆永年昔所推納熟戶也永年不之備羌遽執永年以叛遂為多羅巴所殺探其心肝食之謂其下曰此人奪我國使吾宗族漂落無處所不可不殺也是役也王厚實主其事而謀策皆出永年乃劾永年信任降羌坐受執縛故贈典不及云

潘中

按福建通志中宇民極浦城人崇寧進士知長溪縣

有政聲會鄰寇葉儂叛軍德告急中率兵討之遇害事聞贈朝請大夫

王棟

按臨川縣志棟字儀仲荆公族孫也學士雋無子荆公立棟為後崇觀間為顯謨閣待制知開德府金人寇澶淵誓死與抗城陷遇害贈資政殿大學士賜葬貴溪之舒山

趙育才

按處州府志育才遂昌人政和中為武學生膂力絕倫方臘叛與鄧熹父子集趙壯相犄角邑人恃以不亂時松陽羣盜侵掠及邑乃率所部格於孟山前賊勢張甚手射殺數輩死於壘下聞者莫不嘆息

彭汝方

按宋史彭汝礪傳汝礪弟汝方字直老以汝礪陰為榮陽尉臨城主簿汝礪卒棄官歸葬豐稷畱守南京辟司錄宣和初通判衢州使者疏其治狀擢知州事方臘起睦之青溪與衢接壤寇至無兵可禦衆望風奔潰汝方獨與其僚段約介守孤城三日而陷罵賊以死年六十六徽宗褒嘆之超贈龍圖閣直學士通議大夫諡曰忠毅官其家七人

宋旅

按宋史忠義傳旅字庭實莆田人第進士累官奉議郎知刺縣方臘既陷既歛睦杭衢婺五州且犯越越盜亦起應之縣吏多遁旅遣妻子浮海歸閩獨與民據守以忠義激勵部勒隊伍為豫備計俄而盜衆大至躬率壯銳冒矢石雖頗殺獲終以力不敵遂死之越帥劉幹上其事詔贈朝散郎錄其四子

丁仲修 陳華 張理 李振 輔褒

按宋史忠義傳仲修字敏之溫州人方臘黨俞道安陷樂清將渡江巡檢陳華往捕死之先鋒將張理同李振出南門迎敵渡人接橋橋斷馬蹶溺死賊至帆遊夏祥遣輔褒迎戰數十合褒死之仲修帥鄉兵禦諸樂清鄉兵失據而散仲修以餘兵與賊戰力屈乃死

項德

按宋史忠義傳德婺州武義人郡之禁卒也宣和間盜發射源明年陷婺而邑隨沒德率敗亡百人破賊因據邑之城陞祠自二月訖五月東抗江蔡西拒董奉北捍王國大小百餘戰出則居選鋒之先入則殿後前後俘馘不可勝計賊目為項鶴子聞其鉦則相率遁去方謀復永康諸縣而官兵至德引其衆欲合會賊盡銳邀之黃姑嶺下德戰死邑人哭聲震山谷圖其像歲時祭之

董公健

按紹興府志公健字伯強新昌人宣和庚子冬方臘起桐廬蔓延新昌官吏奔竄莫敢當公健慷慨率子弟聚里中萬人取以紀律遂破賊焚其寨斬首千級境內復安王師討刺西賊微公健為先鋒公健藉累勝之威輕視賊以數百當數千殺獲頗衆已乃王師不進勢孤援絕公健度事不可為呼衆語曰大丈夫寧以義死不可以不義生遂自殺人皆嘆息垂涕贈武功大夫汝州團練使官其諸子

翁開

按袁州府志開壽昌人登政和五年進士宣和二年

攝青溪尉方臘寇起領所部與賊戰不勝被執罵賊而死郡人鄭範爲之傳

王行之

按太平縣志行之字才仲少補上庠恩奏授迪功郎婺州司士曹事宣和三年方臘黨寇婺官吏皆通行之日吾獄官也死分耳遂遇害事聞贈通直郎

梅洛

按金華府志洛其先吳興人五代時有梅聳者始避地來遷浦陽洛以儒受薦爲單州助教年七十餘攝松陽丞宣和二年冬盜發青溪據歙睦遂破杭明年春婺衢處相繼陷兵及境洛勢不能敵死之從子執禮言於朝官其二子敦時敦成敦時後爲遂安令

許瓊

按金華府志瓊字世英東陽人剛毅有力善騎射微時嘗毀淫祠而癘疫息人咸敬之宋宣和中邑懷德鄉寇起瓊集民壯攻討之鄉賴捍衛隨奉檄援郡城有功上其事補秉義郎攝郡事既而睦寇入境屢挫其鋒久之兵食不繼而盜益兵攻城瓊力戰死之屍猶僵立如生能載所乘馬而歸至今廟食於鄉子孫繁衍爲邑巨族

曹夫

按江南通志夫駭人登崇軍第任本州通判方臘之亂死於官

詹良臣

按宋史忠義傳良臣字元公睦州分水人舉進士不第以恩得官調縉雲縣尉方臘起其黨洪再犯處州守貳俱棄城遁又有他盜霍成富者用臘年號剽掠

縉雲良臣曰捕盜尉職也縱不勝敢愛死乎率弓兵數十人出禦之爲所執成富誘使降良臣曰汝輩不知求生顧欲降我邪昔年李順反於蜀王倫反於淮南王則反於貝州身首橫分妻子與同惡無少長皆殊死旦暮官軍至汝肉飼狗鼠矣賊怒鬻其肉使自啖之良臣吐且罵至死不絕聲見者掩面流涕時年七十二徽宗聞而傷之贈通直郎官錄其子孫二人

江仲明 蔣煜

按宋史忠義傳仲明台州人宣和寇亂載老母逃山洞中猝遇寇於東城之岡逼使就降仲明義不辱奮起罵賊卒死之丞相呂頤浩誄以文有蔣煜者州之仙居人有文學寇欲妻以女煜拒之脅以拜亦不從寇曰吾戮汝矣煜伸頸就刃置聲不絕而死

王衡

按臨海縣志衡字平仲大觀中舉八行操守貞介死於方臘之亂賊首聞之自戮其黨數人曰何敢殺王佛子

毛臬

按衢州府志臬字叔纘晚以特恩爲歙士曹睦寇攻城官吏皆遁臬曰吾職司寇獄有繫囚諒不可去乃攝州事時二子貢辟雍即遣人持獄印絕城以出令獻於朝城陷臬坐府上賊脅使降不屈罵賊不絕口嬰刃而死妻錢氏弗忍去婦掖其姑又弗忍去卒遇害事聞贈朝請郎官其後二人

祝汝秩

按處州府志汝秩字君禮麗水人宣和中方臘起睦州寇諸郡汝秩詣闕上書乞爲討賊先鋒補承信郎

卽領兵解郭太尉圍破仇道人洞至台州復捕臘餘黨竟爲賊所害

恬失姓

按西安縣志恬字彥強元豐進士尚廉遷任推官攝西安尉死睦寇之難特贈通直郎官其子清時與甥鄧瑞

方瓊

按通城縣志瓊宣和間命爲顯夷將軍戮力防禦卒死國難葬龍印石立廟鵲鳴嶺下祀之

唐敏求

按宋史忠義傳敏求字好古太平當塗人宣和六年進士調德化主簿盜起敏求挺身率衆捍賊度力不能支論以禍福賊憤詆觸諫而前遂遇害事聞加贈升朝官仍補其子楠將仕郎

孫翊

按山西通志翊宣和末知明寧府被命救太原時敵張甚或言不若引兵北擣雲中翊曰此策甚善奈達君命因冒圍至城下張孝純不肯啓門遂力戰死之

林師益

按福建通志師益仙遊人以父孫任補鷄澤尉上書論邊防利害時以師益所論多可采充守禦後軍統制楊時在講筵奏師益曉達軍政授第一正將已而召入援行次封丘遇敵至師益謂其副曰彼衆我寡其吾致命之秋乎力戰死之弟師舜師早亦死王事

張忠輔

按宋史忠義傳忠輔宣和末爲將同崔中折可與守崞縣金人來攻嬰城固守率士卒以死拒敵中度不

可支有二心忠輔宣言於衆曰必欲降請先殺我中設伏給約議事斬忠輔首擲俾外以示金人既開城門可與不屈見殺可與兄可求建炎中言於朝官可與之子五人而忠輔不與士論惜之

傳察

按宋史忠義傳察字公晦孟州濟源人中書侍郎堯俞從孫也年十八登進士第蔡京在相位聞其名遣子儵往見將妻以女拒弗答調清州司法參軍歷永平淄川丞入爲太常博士遷兵部吏部員外郎宣和七年十月接伴金國賀正旦使是時金將渝盟而朝廷未之知也察至燕聞金人入寇或勸毋遽行察曰受使以出聞難而止若君命何遂至韓城鎮使人不來居數日金數十騎馳入館驛之上馬行次境上察覺有變不肯進曰迂使人故例止此金人輒易其馭者擁之東北去行百里許遇所謂二太子幹離不者領兵至驛道使拜察曰吾若奉使大國見國主當致敬今來迎客而脅我至此又止令見太子太子雖貴人臣也當以賓禮見何拜爲幹離不怒曰吾與師南向何使之稱凡汝國得失爲我道之否則死察曰主上仁聖與大國講好信使往來項背相望未有失德太子干盟而動意欲何爲還朝當具奏幹離不曰爾尚欲還朝邪左右促使拜曰勿如林或梓之伏地衣袂顛倒愈植立不顧反覆論辯幹離不曰爾今不拜後日雖欲拜可得邪麾令去察知不免謂官屬侯彥等曰我死必矣我父母素愛我聞之必大戚若萬一脫幸記吾言告吾親使知我死國少紓其亡窮之悲也衆皆泣是夕隔絕不復見金兵至燕彥等密訪存

亡曰使臣不拜太子昨郭藥師戰勝有喜色太子慮其刼取且銜往忿殺之矣將官武漢英識其屍焚之寒其骨命虎翼卒沙立負以歸立至涿州金人得而繫諸土室凡兩月伺守者意毀垣出歸以骨付其家副使將璽及彥輩歸皆道不屈狀贈徽猷閣待制察自幼嗜學同輩或邀與嬉嬉不肯就爲文溫庭有典裁平居恂恂然無喜慍色遇事若無所可否非其意舉然不可犯恬於勢利在京師故人鼎貴罕至其門間一見寒溫談笑而已及倉卒殉義義舉如此聞者哀而壯之時年三十七乾道中賜諡曰忠肅

朱昭

按宋史忠義傳昭字彥明府谷人以效用進累官秉義郎浮湛班行不自表異宣和末爲震武城兵馬監押攝知城事金兵內侵夏人乘虛盡取河外諸城鎮震武距府州三百里最爲孤絕昭率老幼嬰城敵攻之力昭募驍銳兵卒千餘人與約曰賊知城中虛實有輕我心若出不意攻之可一鼓而潰於是夜縱兵出薄其營果驚亂城上鼓譟衆之殺獲甚衆夏人設木鵝梯衝以臨城飛矢雨激卒不能施然晝夜進攻不止其會悟兒思齊介胃來以鹿盾自蔽邀昭計事昭常服登陴披襟問曰彼何人乃爾不武欲見我我在此將有何事思齊却盾而前數宋朝失信曰大金約我夾攻京師爲城下之盟畫河爲界太原旦暮且下麟府諸壘悉已歸我公何恃而不降昭曰上皇知姦邪誤國改過不吝已行內禪今天子聖政一新矣汝獨未知邪乃取傳禪詔赦宣讀之衆踴躍服其勇辯是時諸城降者多昭故人從旁語曰天下事已矣

忠安所施昭叱曰汝輩背義偷生不異犬彘尚敢以言誘我乎我唯有死耳因大罵引弓射之衆走凡被圍四日城多圯壞昭以智捕禦皆合法然不可復支昭退坐廳事召諸校謂曰城且破妻子不可爲賊汚幸先戕我家而背城死戰勝則東鄉圖大功不勝則暴骨境內大丈夫一生之事畢矣衆未應昭幼子戲階下遽起手刃之長子驚視又殺之徑領數卒屠其家人昇屍納井中部將賈宗望母適過前昭起呼曰娼鄉人也吾不欲刃請自入井娼從之遂併覆以土將士將妻孥者又皆盡殺之昭謂衆曰我與汝曹俱無累矣部落子有陰與賊通者告之曰朱昭與其徒各殺其家人將出戰人雖少皆死士也賊大懼以利陷守兵得登城昭勒衆於通衢接戰自暮達旦屍填街不可行昭躍馬從缺城出馬蹶墜壘敗驪曰得朱將軍矣欲生致之昭瞋目仗劍無一敢前旋中矢而死年四十六

史抗

按宋史忠義傳抗濟源人宣和末爲代州沿邊安撫副使金人圍代急抗夜呼其二子稽古稽哲謂曰吾昔語用事者鴈門控制一道宜擇師增戍以謀未形之患若使橫流則無所措矣言雖切皆不吾省今重圍既固外援不至吾用六千衛占之明日城必陷吾將死事汝輩亦勿以妻子爲念而負國也能聽吾言當令家屬自裁然後同赴義二子泣曰唯吾父命明日城果破父子三人突圍力戰死於城隅

孫益 孫谷

按宋史忠義傳益不知其所以進宣和末以福州觀

察使知朔寧府被命救太原時敵勢張甚或言不若引兵北擣雲中彼之將士室家在焉所謂攻其所必救也益曰此策固善奈違君命因躍馬冒圍至城下張孝純不肯啓門遂死之益天資忠勇每傾貲以賞戰士能得人死力小鞠韓爲邊患遣將致討益子行間師無功益謂子必死朝廷聞之恤錄其孤甚厚其子遣信至益所報平安益怒其子不能死以狀自列盡上還官所賜而斬其持書來者初益在朔寧察郡人孫谷可用奏爲掾屬待之異於常僚益出師屬以後事益死敵騎來攻且別命郡守衆議欲開關迎之谷爭弗得嘆曰吾身已許國又不忍負孫公之託諸人不見容是吾死所也或舉刃稍之無懼容遂見殺

祁翊

按宋史徐徽言傳祁翊宣和末知朔寧府救太原死於陣

郭許 朱友恭

按宋史忠義傳許德順中安堡人從軍積官至武經郎爲涇原第八副將金人犯陝西渭師以下叛降獨許義不許稱病去帥惡忌之傳致以罪下之獄脅使俱降許奮而呼曰大丈夫今得死所矣終不能受汙叛逆大惡天地所不容吾雖死誓不爾貸當訴於地下耳衆醜其語即殺之建炎三年贈武翼大夫忠州刺史同死者朱友恭西安人以忠翊郎爲涇原第一副將步兵扞金人於華亭數有功會金兵大集友恭赴敵力戰爲所得渭師既降誘以甘言許優進官秩不肯從更詆辱之帥不勝忿斷其脛以徇經日乃斬

之後贈敦武郎

吳革

按宋史忠義傳革字義夫華州華陽人國初勸臣廷祚七世孫也少好學喜譚兵再試禮部不中乃從涇原軍以秉義郎幹辦經略司公事金人南牧帥兵解遼州之圍使粘罕軍見之庭揖不拜責其貪利敗約詞直氣勁粘罕少屈爲追回威勝諸屯兵授書使歸欽宗問割地與不割地利害對曰全人有吞噬之意願悉起關中士馬赴都爲備詔以爲武功大夫閤門宣贊舍人持節諭陝西行至朱僊開金人犯京師復還與張叔夜同入城請於帝乞幸秦州又乞出城劫之使不敢近又乞諸門同出兵牽制衝突尾襲應援可一戰而勝時衆言已入皆不果後金兵攻安上門壤道度壕革言之守將使洩蔡河水以灌之不聽及壤道將合欲用前議則水已涸矣車駕幸金營革以爲隨其計往請叔夜欲身見其大會計事叔夜問其故曰茲行有三說一則天子還內二則金騎歸國三則革死叔夜爲言之不報上皇妃后太子出郊革白孫傳文留之不得乃與傳謀于啓聖僧院置振濟局募士民就食一日之間至者萬計陰以軍法部勒將攻金營久之遷於同文館所合已至數萬多兩河曉悍之士既而有立張邦昌之議革謀先誅范瑒輩以三月八日起兵謀既定前期二日有班直甲士數百人排闥入言邦昌以七日受冊請亟起事革乃披甲上馬至咸豐門四面皆瑒黨給革入帳即執之脅以從逆革罵之極口引頸受刃顏色不變其麾下百人皆死 按張邦昌傳邦昌即僞位僭號大楚擬都金陵遂升文德殿設位御牀西受賀遣閤門傳令勿拜時雍率百官連拜邦昌但東面拱立外統制官宣贊舍人吳革恥屈節異姓首率內親事官數百人皆先殺其妻孥焚所居謀舉義金水門外范瑒許與合謀令悉棄兵杖乃從後襲殺百餘人捕革併其子皆殺之又禽斬十餘人是日風霾日暈無光百官慘沮邦昌亦變色唯時雍開倚瓊等欣然鼓舞若以爲有佐命功云

李翼 李聳 王唐臣 劉子英 閻城

按宋史忠義傳翼麟州新秦人宣和末爲代州西路都巡檢使屯岢縣金人取代執守將嗣本進來論降翼射却之帥士卒堅守義勝軍統領崔忠殺都監張洪輔夜引金兵入城翼挺身搏戰達旦力不敵被執會粘罕欲臣之怒罵不屈與縣令李聳丞王唐臣尉劉子英監酒閤城將官折可與同死之

阮駿

按宋史李翼傳駿興化軍人紹聖元年進士爲河南府少尹金人犯京師率所募兵擁護神御殿抱神御馬聲不絕口卒被害特贈朝議大夫

孫逢

按宋史忠義傳逢眉山人大觀四年進士累官至太學博士張邦昌僭立有司起百僚入賀逢獨堅臥不起夜既半同僚強起之不從至垂泣與之談時副部員外郎喻汝礪聞變捫其膝曰不能爲賊臣屈遂掛冠去事畢有司舉不至者欲以逢與汝礪復于金人邦昌以畢至告乃免逢聞之曰是必將肆赦還官以重汗我我其可俟遂發疾而卒

欽定古今圖書集成明倫彙編官常典

第七百二十三卷目錄

忠烈部名臣列傳十八

宋二



王士言	霍安國
王美	林淵
張彭年	趙士訥
張謙	于潛
沈敦	張行中
張確	呂由誠 子伯良
趙令佳	郭永
劉翊	劉士英
王稟	黃友
蔣興祖	徐揆
陳邁	李涪
張克戩	楊震 父宗閔 子居中
歐陽珣	陳德固
姜綬	林子立
李震	杜翊世
劉幹	張叔夜
何鼎	孫傳
梅執禮	邊知章
孫察	李琪
李升	蔡琳
曾升	葉鑑
石昉	劉化源
詹樞	安扶

劉倚友	詹友
曾悟	李政
單 大各	祝公明 子簡
李若木	李彥仙
賈何	閻平
趙成	邵雲
呂圖登	朱炎
胡唐老	鄭凝
上官悟	李階
危一	程次山 字次石
孫鉉	趙士跋
孫方武	江應洪
蘇幼安	劉純
僧真寶	

官常典第七百二十三卷
忠烈部名臣列傳十八

宋二

王士言

按宋史忠義傳王士言武舉進士累立戰功西北服其威名宣和初擢河東廉訪使者方臘為寇詔擇材略之士馮熙載薦為東南第三將首解嘉興之圍靖康元年詔以浙西兵往河東防秋金人攻澤州畢力守禦金兵日增士言分必死他將力屈城西南遂陷乃

使親卒持劍歸報巷戰而死康允之上其事贈拱衛大夫忠州團練使官其後五人

霍安國 王美 林淵 張彭年 趙士訥

張謙 于潛 沈敦 張行中

按宋史忠義傳安國不知何許人燕山之復以直隴關為轉運判官宣和末知懷州靖康元年路允迪奉使至懷表其治狀加直龍圖閣歲中進右文集英殿修撰徙知隆德府未行復留金駟再至遂被圍安國扞禦不遺力鼎澧兵亦至相與共守拜徽猷閣待制然竟以閏十一月城陷將官王美投濠死粘罕引安國以下分為四行使夷官問不降者為誰安國曰守臣安國也問餘人通判州事直徽猷閣林淵兵馬鈐轄濟州防禦使張彭年都監趙士訥張謙于潛鼎澧將沈敦張行中及隊將五人同辭對曰淵等與知州一體皆不肯降會令引於東北鄉望其國拜降皆不屈乃解衣面縛殺十三人而釋其餘安國一門無噍類明年贈延康殿學士

張確

按宋史忠義傳確字子固邢州宜祿人元祐中擢進士第徽宗即位應詔上書言十事乞誅大姦退小人進賢能開禁錮起老成擢忠鯁忠邊事修文德廣言路客直諫遂列於上籍宣和二年召至京師青溪盜起確言此皆王民但庸人擾之耳願下哀痛之詔省不急之務租賦之外一切罷罷敢以花石淫巧供上者死撫綏脅附母以多殺為功旬浹之間可以殄滅忤王黼意通判杭州攝睦州事有自賊中逃歸者悉宥之訪得虛實以告諸將用其言盜平知坊汾二州

七年徙解州又徙隆德府金兵圖太原析代降平陽兵叛確表言河東天下根本安危所係無河東豈特秦不可守汴亦不都矣敵既得叛卒勢必南下落城百年不修築將兵又皆成邊臣生長西州頗諳武事若得秦兵十萬人猶足以抗敵不然惟有一死報陛下耳書累上不報明年二月金兵至知城中無備論使降確乘城拒守或獻謀欲自東城潰圍出且探確意確怒叱曰確守土臣當以死報國頭可斷腰不可屈乃戰而死欽宗聞之悲悼優贈述古殿直學士召見其子宙慰撫之曰卿父今之巡邏也得其死所矣復何恨使爲將爲守者皆如卿父朕願有今日邪敘容嘆息者久之

呂由誠子仍 趙令佳

按宋史忠義傳由誠字子明御史中丞誨之子子幼明爽有智略范鎮司馬光父友也皆器重之以父恩補官調鄧州酒稅臨事精敏老吏不能欺會營兵竊發聚衆閉城守貳逃匿由誠親往招諭賊斂兵聽命以功遷秩尋擢提舉三門白波輩運言者謂其資淺罷之知合水縣王中立种諤征靈州由誠部運隨軍天寒食盡他已役夫多潰去唯由誠所部分無失者改知乘氏縣丞相呂大防爲山陵使辟爲屬通判成都府知雅嘉溫緜四州復知嘉州皆有治績靖康元年宰相唐恪薦由誠剛正有家法宜任臺臣召至京師與恪議不合且憂其蓄縮不足以濟時艱力辭求退差知襲慶府未及出關金人再入陷京師立張邦昌以兵脅士大夫臣之由誠徹服得免時羣盜所在竊起由誠崎嶇至郡城圯糧竭於是晝夜爲備版築

甫就劇賊李昱擁十萬衆奔至城中知其有備陽受元帥府招安而去康王移軍濟陽由誠竭力饋餉軍以不乏遣官屬王允恭奉表勸進時京東諸郡兵驕多內訌獨由誠拊循有方士樂爲用前後數被攻圍屹然自立羣盜中救援皆絕孔彥舟以鄆兵叛首犯郡境攻之累旬不能下始引去胡選者衆尤殘暴攻由誠示必取由誠夜焚其攻具直入帳下賊駭散不知所爲忽解圍去一日金兵四集由誠嚴立賞罰厲以忠義守兵爭奮晝夜警備金人百道攻城矢石如雨人無叛志郡官有迎降者執而械之判官趙令佳同心誓守城陷俱被執金人欲生降之由誠不屈乃殺其子仍於前由誠不顧與令佳同遇害子僕與其家四十口皆被執無生還者南北隔絕其孫紹清雷蜀後自蜀走江浙訪由誠生死遇令佳之子彝於江陰知令佳與由誠同死被褒典乃懇於朝詔贈由誠三官爲通奉大夫與二子恩澤

郭永

按宋史呂由誠傳永大名府元城人少剛明勇決身長七尺鬚髯若神以祖任爲丹州司法參軍守武人爲姦利無所忌永數引法裁之守大怒盛威臨永永不爲動則縲爲好言薦之朝後守欲變具獄永力爭不能得袖舉牒還之拂衣去調清河丞尋知大谷縣太原帥率用重臣每宴費千金取諸縣以給斂諸大谷者尤亟永以書抵幕府曰非什一而取皆民膏血也以資觴豆之費可乎脫不獲命令有投劾而歸耳府不敢迫縣有潭出雲雨歲旱亟乘此譁民永杖巫暴日中雨立至縣人刻石紀其異府遣卒數輩號

警盜刺諸縣短長遊蠶不歸其敢逐永械致之府府爲并它縣追還於是部使者及郡文移有不便於民者必條利病反復或遂寢而不行或謂永世方雷同母以此賈禍永曰吾知行吾志而已皇恤其大谷人安其政以爲自有令無永比者既去數年復過之則老稚遮翕如永始去調東平府司錄參軍府事無大小永咸決之更有不能辦者私相斬曰爾非郭司錄耶通判鄭州燕山兵起以永爲其路轉運判官郭藥師屯邊怙恩暴甚與民市不償其直復毆之至壞目斷支乃已安撫使王安中莫敢問永白安中不治且難制請見而顯責之不從則取其尤者陳之市乃見藥師曰朝廷負將軍乎藥師驚曰何謂也永曰前日將軍杖策歸朝廷上推赤心置將軍腹中客遇之禮無所不至而將軍未有尺寸功報上也今乃倚將軍爲重乃縱部曲戕民不禁平居尚爾如緩急何藥師雖謝無愧容永謂安中曰它日亂邊者必此人也已而安中罷永亦辭去移河北西路提舉常平會金人趨京師所逼城邑欲立取之是時天寒城池皆凍金率藉冰梯城不攻而入永適在大名聞之先弛濠源之禁人爭出漁冰不能合金人至城下睥睨久之而去遷河東提點刑獄時高宗在揚州命宗澤守京師澤厲兵積粟將復兩河以大名當衝要檄永與師杜充漕張益諫相犄角永即朝夕謀戰守具因結東平權邦彥爲援不數日聲振河朔已汲州縣皆復應官軍金人亦畏之不敢動居亡何澤卒充守京師以張益諫代之而裴億爲轉運使益諫德輿輒小人會范瓊習邦彥南去劉豫舉濟南來寇大名孤城無援

永率士晝夜乘城伺間則出兵狙擊或勸益謙委城遁水曰北門所以蔽遮梁宋彼得志則席卷而南朝廷危矣惜力不敵猶當死守徐劉其鋒待外援之至奈何棄之因募士齋帛晝夜絕城出告急朝廷乞先為備攻圍益急俾東平濟南人呼城下曰二郡已降降者富貴不降者無噍類益謙輩相顧色動永大言曰今日正吾儕報國之時又行城撫將士曰王師至矣吾城堅克可守汝曹努力敵不足畏也衆感泣質明大勝四塞豫以車發斷碑殘礎攻城樓櫓皆壞左右紫盾而立多碎首者良久城陷永坐城樓上或掖之以歸諸子環泣請去永曰吾世受國恩當以死報

衆巢傾卵覆汝輩亦何之茲命也奚懼益謙億率衆迎降金人曰城破始降何也果以永不從為辭金人遣騎召永永正衣冠南向再拜訖易幅巾而入粘罕曰沮降者誰永熟視曰不降者我金人奇永狀貌且素聞其賢乃自相語欲以富貴陷永永瞋目唾曰恨不醢爾以報國家何說降乎怒罵不絕金人諱其言摩之使去永復厲聲曰胡不速殺我死當率義鬼滅爾曹大名人在繫者無不以手加額為之出涕金人怒斷所舉手乃殺之一家皆遇害雖素不與永合者皆面勸金人去相與負其屍瘞之永博通古今得錢即買書家藏書萬卷為文不求人知見古人立名節者未嘗不慨然掩卷終日而九墓頗真卿為人充之守大名名稱甚盛永嘗畫數策見之它日問其目曰未假讀也未數之曰人有志而無才好名而遺實驕

蹇自用而得名聲以此當大任鮮不顛沛者公等足與為治乎充大慙靖康元年冬金人再犯京師中外

阻絕或以兩宮北狩告永者永號絕仆地家人昇歸不食者數日聞大元帥府檄書至始勉強一餐其忠義蓋天性然紹興初贈中大夫資政殿學士謚勇節官其族數人

劉翊

按宋史忠義傳翊靖康元年以吉州防禦使為真定府路都鈐轄金人攻廣信保州不克遂越中山而攻真定翊率衆晝夜搏戰城上金兵初攻北壁翊拒之乃僞從攻東城宣撫使李迥復趨翊往應越再宿潛移攻具還薄北城衆攀堞而上城遂陷迥就執翊猶集左右巷戰已而稍亡去翊顧其弟曰我大將也其可受賊戮乎挺身潰圍欲出諸門已為敵所守乃之孫氏山亭中解條自縊死

劉士英 王稟

按宋史忠義傳士英宣和間為溫州教授方臘陷處州州人爭具舟欲遁士英奮謂不當避自郡將而下皆排沮之士英獨身任責推郡茂才石礪為謀主治兵時糧籍保伍分其地為八隅委官統率以鐘為約令民聞鐘聲則趨所守堞未幾賊來攻拒守凡四十餘日官軍既至賊潰去靖康初通判太原府金人入境帥臣張孝純欲避之士英率通判方笈將官王粟力止孝純及城陷粟赴火死士英持短兵接戰死之笈在金因講和使附書言二人死節後刻石於溫衢

二州

黃友

按宋史忠義傳友字龍友溫州平陽人少不羈十五入太學語同輩曰大丈夫不能為國立功亦造化中

贅物耳因投筆西遊邊帥劉法一見奇之延致門下會西鄙軍閫都護高永年戰沒友作七詩哀其忠其後幕府奏功沒永年之實恤典不及其子以友詩進徵宗覽之惻然遂加贈諡友亦免省試登進士第調永嘉瑞安二縣主簿攝華陰令有政聲方臘竊發友同諸將收復所至披靡發寇復作守留友攝兵曹為殄滅計友請往諭之既次浦江賊望風解去復單騎大武義賊衆持釘一棹置其前友正色叱之曰汝等何速死耶賊首李德壯之壘麾退一境貼然黎人圖像祀之通判澶州會金人敗盟郭藥師以常勝軍叛燕士響應友獨領數千人與之戰躬冒矢石破裂唇齒欽宗即位制置使詹度奏友久服武事籌略過人丞相何果從而薦之召對問友唇齒破裂狀為之稱嘆責予甚渥進直徽猷閣制置司參謀官同种師中解太原圍友遣兵三千奪榆次得糧萬餘斛明日大軍進榆次十里而止友亟白師中地非利將三面受敵論不合友仰天嘆曰事去矣迨曉兵果四合矢石如雨敵益以鐵騎士卒奔潰敵執友謂曰降則赦汝友厲聲曰男兒死耳遂遇害帝書忠節傳家四字旌其閭官其後八人友體貌英偉膽雄萬夫謀畫機密出人意表嘗語子弟曰天下承平日久武事玩弛萬一邊書告警馬革裹尸乃吾素志他日收吾骸足心黑子為識也其忠誠許國根於天性如此

蔣興祖

按宋史忠義傳興祖常州宜興人之奇之孫也以蔭累調饒州司錄睦州盜起旁郡皆震興祖曰州將料史卒緝賊具盜不敢謀以功遷官知開封府武陽縣

武古博浪沙地土脈脆惡大河薄其南膏積雨汎溢
埽具潰與祖躬救護露宿其上彌旬四院以不壞治
爲畿邑最使者交薦之靖康初金兵犯京師道過縣
或勸使走避與祖曰吾世受國恩當死於是與妻子
畱不去監兵與賊通斬以徇金數百騎來攻不勝去
明日師益至力不敵死焉年四十二妻及長子相繼
以慘死詔贈朝散大夫

徐揆

按宋史忠義傳揆衢州人遊京師入太學靖康元年
試開封府進士爲舉首未及大比而遭國難欽宗詣
金營不歸揆帥諸生扣南薰門以書抵二酋請車駕
還關其略曰昔楚莊王入陳欲以爲縣申叔時諫復
封之後世君子莫不多叔時之善諫楚子之從諫千
百歲之下猶想其風采本朝失信大國背盟致討元
帥之職也郡城失守社稷幾亡而存元帥之德也兵
不血刃市不易肆生靈幾死而活元帥之仁也雖楚
子存陳之功未能有過我皇帝親屈萬乘兩造轅門
越在草莽國中喁喁望屬車之塵者屢矣道路之
言乃謂以金銀未足故天子未返揆竊惑之今國家
帑藏既空編民一妾婦之飾一器用之微無不輸之
公上商賈絕迹不來京邑區區豈足以償需索之數
有存社稷之德活生靈之仁而以金帛之故留賢君
父是猶愛人之子弟而辱其父祖與不愛無擇元帥
必不爲也願推惻隱之心存始終之惠返其君父班
師振旅援以時日使求之四方然後遣使人奉獻則
楚封陳之功不足道也二酋見書使以馬載揆至軍
詰難揆厲聲抗論爲所殺建炎二年追錄死節詔贈

宣教郎而官其後

陳遵

按宋史忠義傳遵子亨伯其先自江寧徙永州登進
士第知莘縣爲治有績魏尹蔣之奇馮京許將交薦
之知雍丘縣徵宗將以爲御史而遭父祐甫憂畢喪
爲廣西轉運判官蔡京啓蠻獫狁地建平從允三州遵
言蠻人幸安靜輕擾以兆釁不可京惡之以他事罷
歸旋知商州興元府入爲駕部金部員外郎張商英
得政用爲左司員外郎俄擢給事中會商英免相蔡
疑攝封駁力沮止之遵懼請外以直祿闕爲河北轉
運使加直龍圖閣從陝西召還京師而蔡京復相再
使河北徙淮南帝將易置發運使命選諸道計臣有
閔閱者執政以遵言京曰職卑不可用願更選帝曰
可除集英殿修撰使往京乃不敢言遂爲副使未幾
升爲使朝廷方督綱餉運渠壅遵使決呂城陳公
兩塘達於渠漕路甫通而朱勔花石綱塞道官舟不
得行遵捕繫其人而上章自劾帝爲驚動人進遵微
猷閣待制宣和二年冬方臘亂詔以屬遵遵言臘始
起青溪衆不及千今脅從已過萬又有蘇州石生歸
安陸行兒皆聚黨應之東南兵弱勢單士不習戰必
未能滅賊願發京畿兵鼎澧槍盾手兼程以來庶幾
蜂起愚民不至滋蔓帝悉行其言加龍圖閣直學士
經制七路治于杭時縣官用度百出遵創議度公私
出納量增其贏統經制錢其後總制使俞彥國倣其
式號總制錢於是天下至今有經總制錢名自兩人
始也又言妖賊陳州縣唯搜求官吏悉行殺戮往往
斷截支體採取肺肝或熬以鼎油或射以勁矢備

極慘毒不償怨心蓋貪汙嗜利之人倚法侵牟騷動
不知憂極積有不平之氣結於民心一旦乘勢如此
可爲悲痛此風不除必更生事臣願采摭官吏姦賊
尚仍舊習者按治以聞乞重賞於理許之又進學士
凡所施置以御筆先下於是劫越州王仲雍科市民
造金茶器減直買軍糧券而以私錢取之仲疑坐黜
杭經巨寇後河渠壅塞邦人以水潦爲病前守數請
於朝皆以勞費輟役遵以冬月撤具揚潤楚諸郡凡
守牘綱卒悉集治所先是當閉牘羣卒無以食率凍
餓不自聊聞命相率呼舞以來者二千人用其力治
河不兩月畢杭人利焉徙河北都轉運使進廷康殿
學士歷知中山真定河間府欽宗立加資政殿學士
積官至光祿大夫復爲真定又徙中山金人再至遵
冒圍入城堅壁拒守詔康王領天下大元帥命遵爲
兵馬元帥受圍半年外無援師京師既陷割兩河求
和遵弟光祿卿適至中山臨城諭旨遵遙語之曰主
辱臣死吾兄弟平居以名義自處寧當賣國家爲囚
俘乎適泣曰兄但盡力勿以弟爲念遵呼總管使盡
括城中兵擊賊總管辭遂斬以徇又呼步將沙振往
振素有勇名亦固辭遵固遣之振怒且懼潛束刃入
府遵委定奴責其輒入振立殺之遂害遵於堂及其
子錫并僕妾十七人長子鉅以官淮南獲免振出帳
下卒謀而前曰大敵臨城汝安得殺吾父執而碎裂
之身首無餘城中無主乃開門出降金人入見其屍
曰南朝忠臣也斂而葬諸鐵柱寺建炎初贈特進遵
性孝友爲人寬厚長者任部刺史二十年每出行郡
邑必焚香祈天願不遂貪濁吏嘗罵王安中呂頤浩

張懋謝克家何鏞後皆至公輔世以爲知人適由開封少尹衛尉少卿至光祿卿是役也金人執之以北後十年死於雲中

李涓

按宋史忠義傳涓字浩然駙馬都尉遵勛曾孫也以蔭爲殿直召試中書易文階至通直郎知鄂州崇陽縣靖康元年京城被圍羽檄召天下兵鄂郡縣七當發二千九百人皆未集涓獨以所募六百銳然請行或謂盍徐之以須他邑涓曰事急矣當持一信報天子爲東南倡而募士多市人不能軍涓出家錢買牛酒激犒之令曰吾固知無益然世受國恩唯直死耳若曹知法乎失將者死鈞之一死死國爾名男兒不朽事也衆皆泣即日引而東北過淮蒲圻嘉魚二縣之兵始至合而前至蔡天大雪蔡人忽謀而奔曰敵至矣即結陣以待少焉游騎果集涓馳馬先犯其鋒下皆步卒蒙盾盾徑進頗殺其騎且走涓乘勝追北十餘里大與敵遇飛矢朔集二縣兵亟舍去涓創甚猶血戰大呼叱左右貨已遂死焉年五十三士卒死者六七上官有忌涓者者亡卒誣已遁明年金兵去蔡人以其屍歸朝廷錄其忠贈朝奉郎官其三子

張克誠

按宋史忠義傳克誠字德祥侍中曾孫也第進士歷河間令知吳縣吳爲浙劇邑民喜爭大姓怙勢持官府爲令者踵故抑首務爲不生事幸得去而已克誠一裁以法姦猾屏氣使者以狀聞召拜衛尉丞初克誠從弟克公爲御史劾蔡京再輔政修怨於張氏以徵事黜克誠踰年起知祥符縣司開封戶曹提

舉京東常平入辭留爲庫部員外郎宣和七年八月知汾州十二月金兵犯河東圍太原太原距汾二百里遣將銀朱李董來攻縱兵四掠克誠畢力扞禦燕人先內附在城下者數十陰結黨欲爲內應悉收斬之數選勁卒撓敵營出不意焚其棚敵懼引去論功加直祕閣靖康元年六月金兵復逼城朝廷命經略使張孝純之子灝都統制張思正轉運使李宗來援思正誅求無藝民不堪命克誠引諒開曉皆願自奮宣撫使李綱表其守城之勞連進直龍圖閣右文殿修撰太原不守思正給云出戰遂率灝宗奔慈隰於是人無固志戍將麻世堅中夜斬關出通判韓玘相繼亡克誠召令兵民曰太原既陷吾固知亡矣然義不忍負國家辱父祖願與此城終始以明吾節諸君其自爲謀皆泣不能仰視同辭而對曰公父母也願盡死聽命乃益厲兵徹守賊至身帥將士擐甲登陣雖屢却敵而援師訖不至金兵破平遙平遙爲汾大邑久與賊抗既先陷又脅降介休孝義諸縣據州南二十村作攻城器具兩遣使持書諭克誠焚不啓具連危苦之狀募士問道言之朝不報十月朔金益萬騎來攻愈急有十人唱爲降語斬以徇諸酋列城下克誠臨罵極口咆中一酋立斃度不得免手草遺表及與妻子遺書絕州兵持抵京師明日金兵從西北隅入殺都監賈直克誠猶帥衆巷戰金人募生致之克誠歸索朝服焚香南向拜舞自引決一家死者八人金將奉其屍屍葬於後園羅拜設祭爲立廟事聞詔贈延康殿學士贈銀三百兩絹五百匹表揭門閭紹興中諡忠確

楊震父宗閣子居中執中

按宋史忠義傳震字子發代州崞人以弓馬絕倫爲安邊巡檢河東軍征賊底河敵據山爲城下瞰官軍諸將合兵城下震率壯士拔劍先登斬數百級衆乘勝平之上功第一從折可存討方臘自浙東轉擊至三界鎮斬首八千級追襲至黃巖賊帥呂師囊扼斷頭之險拒守下石肆擊累日不得進可存問計震請以輕兵緣山背上憑高鼓譟發矢石賊驚走已復縱火自衛震身被重鎧與麾下履火突入生得師囊及殺首領三十人進秩五等還知麟州建寧若初契丹之亡其將小鞠鞞西奔招合雜羌十餘萬破豐州攻麟府諸城郭震父宗閣領本道兵馬屢摧敗之俘其父母妻子靖康元年十月太原陷鞞驅幽薊叛卒與夏人奚人圍建寧叩壁語震曰汝父奪我居破我兵掩我骨肉我忍死到今急舉城降當全汝軀命時城中守兵不滿百震與戰士約斬一級賞若干官帑竭繼以家人服珥吏士感激自奮越旬矢盡力乏城不守與子居中執中力戰歿閨門俱喪唯長子存中從征河北獨免明年宗閣亦死事於長安震時年四十四建炎二年詔贈武經郎存中貴請於朝諡曰恭毅

歐陽珣

按宋史忠義傳珣字全美吉州廬陵人崇寧五年進士調忠州學教授南安軍司錄知鹽官縣以薦上京師遇國難及出使加將作監丞金人犯京師朝議割河北絳磁深三鎮地講和珣率其友九人上書極言祖宗之地尺寸不可以與人及事急會羣臣議珣復

抗論當與力戰戰敗而失其地它日取之直不戰而割其地它日取之曲時幸怒欲殺珣適遣珣奉使割深州珣至深州城下慟哭謂城上人曰朝廷為姦臣所誤至此吾已辦一死來矣汝等宜勉為忠義報國金人怒執送燕焚死之

陳德固

按金華府志德固金華人靖康初為京城守禦司屬官嘗獻守禦之策朝議沮之及京城失守督士卒力戰而死潘良貴哭以詩有云人皆趨北關君獨死南門祕計無人用英聲有史存蓋紀實也于岩肖仕至兵部侍郎

姜綬

按宋史忠義傳綬處州麗水人金人再犯京師內外不相聞朝廷募忠勇士齋蠟書往南京總管司調兵赴援綬以忠翊郎應募乃剖股藏書緘下南壁為通騎所獲厲聲叱罵遂被害建炎中州上其事官其子特立承信郎

林子立

按福建通志于立字伯興興化人政和初進士知茶陵州靖康元年募集勤王兵赴道至荆門遇戰眾寡不敵中流矢死

李震

按宋史忠義傳震汴人也靖康初金人迫京師震時為小校率所部三百人出戰殺金人馬七百餘已而被執金人曰南朝皇帝安在震曰我官家非爾所當問金人怒糾諸庭柱斲割之膚肉垂盡腹有餘氣猶罵不絕口

杜翊世

按四川總志翊世華陽人紹聖進士通判懷遠軍靖康初中原多故夏人乘隙入寇奄至城翊世與知軍劉銓率眾守禦謀徙妻子於長安妻張氏曰軍同死此城陷賊脅使降翊世瞋目叱之舉家皆沒烈焰中死事聞贈朝議大夫官其後表所居曰忠義坊

劉幹

按宋史忠義傳幹字仲偃建州崇安人第進士調豐城尉隴城令王原鎮熙州辟狄道令提舉陝西平貨司河湟兵屯多食不繼幹延致酋長出金帛從易粟就以餉軍公私便之遂為轉運使擢中大夫集英殿修撰劉法死夏人攻震武輪攝師鄜延出奇兵擣之解其圍夏人來言願納款謝罪皆以為詐幹曰兵興累年中國尚不支况小邦乎彼雖新勝其眾亦疲懼吾再舉故款附以圖自安此情實也密疏以聞詔許之夏使愆期不至諸將言夏果詐請會兵乘之幹曰越境約會容有他故會再請者至幹戒曰朝廷方事討伐吾為汝請毋若異時遽歲幣軼疆場以取威怒夏人聽命西邊自是遂安幹求東歸拜徵猷閣待制提舉崇福宮起知越州鑑湖為民侵耕官因收其租歲一萬斛政和間涸以為田衍至六倍隸中宮應奉租太重而督索嚴多逃去則勒鄰伍取償民告病幹請而蠲之方臘陷衢婺越犬震官吏悉遁或具舟請行幹曰吾為郡守當與城存亡不為動益厲戰守備寇至城下擊敗之拜述古殿直學士召為河北河東宣撫參謀官時邊臣言燕民思內附重賞募收方出師而种師道之軍潰幹意警報不實見師道計事師

道曰契丹兵勢尚盛而燕人未有應者恐邊臣誣誤國事幹即馳白貫攸諸班師又論燕不可得正使得之屯兵遣餉經費無藝必重困中國還次莫州會郭藥師以涿州降戎車再駕以幹議異徙知真定府藥師入朝幹密奏乞留之不報從知建州改福州加延康殿學士或言其過關時見御史中丞有所請遂罷起知荆南河北盜起復以守真定首賊柴宏本富室不堪征斂聚眾剽殺殺巡尉統制官亦戰死幹單騎赴鎮遣招之宏至服罪幹飲之酒奏以官縱其黨還田里一路遂平藥師請馬詔盡以河北戰馬與之不足又賦諸民幹曰空內郡租駁付一降將非計也請止之金已謀南收朝廷方從之求雲中地幹謀得實急以聞且陰治城守以待變是冬金兵抵城下知有備留兵其旁長驅內擲及還治梯衝設圖示欲攻擊幹發強弩射之金人知不可陷乃退自金兵之來諸郡皆塞門民坐困幹獨縱樵牧如平日以時啓閉欽宗善之拜資政殿學士時已計割地賂金人而議者乘士民之情復議進蹕蹕以亟戰為非是時諸將救太原种師中姚古敗以幹為宣撫副使至蓬州招集糾募得兵四萬人與解潛折可求約期俱進兩人又繼敗初幹遣別將賈瓊自代州出敵背且許義軍以爵祿得首領數十既復五臺而潛可求敗聞遂不果進太原陷召入觀為京城四壁守禦使宰相沮罷之京城不守始遣使金營金人命僕射韓正館之僧舍正曰國相知君今用君矣幹曰偷生以事二姓有死不為也正曰軍中議立異姓欲以君為正代得以家屬行與其徒死不若北去取富貴幹仰天大呼